

DISSERTATIONE SECUNDA  
**IMPVTATIONEM CVLPÆ  
CIRCA CONTRACTVS**

CVM PRIMIS  
**INNOMINATOS ET REALES**

EX CONSENSV  
ILLVSTRIS ICTORVM ORDINIS  
PVBLICAE ERVDITORVM DISQVITIONI



SVBIIICIUNT  
**P R A E S E S**

**IO. IVSTINVS SCHIERSCHMID**

PHIL. ET I. V. D.

ET RESPONDENS

**GEORGIVS BVRCHARDVS BAERMANN**

LIPSIENS.

---

DIE VIII. SEPTEMBR. ANNO M DCC XXXV.

---

**L I P S I A E**  
LITERIS IO. CHRISTIANI LANGENHEMII.

*A. L. M.*  
Digitized by Google

# THE UNIVERSITY OF CHICAGO

CHEROY CONFIDENTIAL

[illegible]

EXHIBIT A

Y6732200 731

INVESTMENT ORDINANCE

INSTITUTIONAL DISPOSITIONS

217, 117, 12

222, 4. 219

САНГОСЯН. 02.07.1971.01

10.7.1.13.11.9

1. 2. 3. 4. 5. 6. 7. 8.

COLETTA BARCELA, 18 TERRANIN

2. 11. 11

10. *Chlorophyll a* and *Chlorophyll b* content were determined using a spectrophotometer (Shimadzu UV-160U) at 663 nm and 646 nm, respectively. The concentration of chlorophyll was calculated using the following formula:  $\text{Chlorophyll } a = 12.7 \times \text{OD}_{663} - 2.13 \times \text{OD}_{646}$  and  $\text{Chlorophyll } b = 22.9 \times \text{OD}_{646} - 4.74 \times \text{OD}_{663}$  (Arar and Solman, 2005).

341251

LITERIS IO: CHRISTI / LIBERENT / ...

1875



DISSERTATIO SECVNDA

DE IMPVTATIONE CULPAE CIRCA  
CONTRACTVS CVM PRIMIS INNOMI-  
NATOS ET REALES.

§. I.



Imputationem culpaе circa contractus complures Icti ad scientificam Iuris cognitionem adspirantes suis difficultatibus liberare atque ad principia certa reducere annisi fuere: Quorum conatui satis felici vltiora principia, notionesque determinatas subministrare iamiam in elementis meis et in prima dissertatione incep̃i. Cum autem in illa Dissertatione hancce materiam de imputatione culpaе circa contractus promiserim: eandem in praesenti vberiori calamo exponere animus fuit: Ast cum principia, quae haec imputatio, praeter illa, quae in prima tradidi, in specie praestruit, plures paginas impleuerint: Inde ista hoc loco eruta principia tantum ad innominatos et contractus reales applicare mihi contigit; imputationem autem culpaе circa reliquos contractus et pacta legitima in tertia exponere cogor.

## §. II.

Declarationem voluntatis alteri factam de realiqua effectui danda, vel ab eodem reprimenda, vocamus *consensum*. Sed voluntatem nostram vel verbis vel facto, a quo ad illam concludimus, declarare possumus. Inde *consensus expressus* concipitur et *tacitus*.

## §. III.

Ea, quae rei cuidam ordinarie vel insunt, vel adfunt, efficiunt *praesumptionem*. Cum igitur quilibet ordinarie suam velit vtilitatem et ea, quibuscum illa connexa. Quare quilibet praesumitur, se velle vtilitatem et ea, quae cum illa connexa sunt. Inde constat quid *consensus praesumptus* sibi velit. (§. 2.)

## §. IV.

*Promittere aliquid* est affirmare, se velle alteri aliquid praestare, et *acceptare promissum* est consentire in alterius promissum. Vnde intelligitur, quid sibi velit promissum acceptatum ab altero, quo *pactum* absoluitur.

## §. V.

Promittens affirmat, se velle alteri aliquid praestare (§. praec.) praestare alteri aliquid, est vel aliquid effectui dare, vel ab eodem reprimere. Promittens adeo affirmat, se velle intuitu alterius vel aliquid effectui dare, vel ab eodem reprimere. Quicquid effectui dari debet, vsum virium quarundam eidem sufficientium praestruit. Promittens adeo affirmat, se velle *vti viribus suis promisso sufficientibus intuitu alterius*.

## §. VI.

Promittens affirmat, se velle *vti viribus suis promisso sufficientibus intuitu alterius* (§. praec.) Promissum est finis, et is, qui vtitur viribus suis intuitu alterius in fine aliquo obtinendo, alterum virium suarum participem reddit in fine aliquo obtinendo. Promittens adeo affirmat, se velle *virium quarundam suarum in fine alterius obtinendo alterum participem reddere, et consequenter alteri auxilium exhibere*.

## §. VII

## §. VII.

Acceptans promissum in promissum alterius consentie (§. 4.) adeoque idem vult ac promittens. (§. 2.) Sed promittens vult alteri auxilium exhibere (§. praec.) *Quare promissum acceptans vult, ut auxilium quoddam a promittente sibi exhibeatur.* Vnde constat, quod auxilium, quo alter indiget, et quod alter priori exhibere contendit, sit id, ex quo genesis promissi acceptati ab altero, et consequenter pacti concipitur. Cum autem porro id, quod auxilium nobis praebet, simul vtilitatem praestet. Inde apparet, quod *vtilitas, qua vnus ab altero indiget, et quam alter eidem conferre contendit, causam ordinarie dederit pactis in-eundis.* conf. *Illustr. RECHENBERGII Instit. Iurispr. Natur. l. II. t. 2. §. 2.*

## §. VIII.

Vtilitas ex re alterius proueniens, qua vnus ab altero indiget, causam dedit paciscendi hominibus (§. praec.) Verum homines ordinarie gratis boni seu benigni non sunt, uti principia psychologiae et experientia loquuntur. Quare homines vtilitatem ex rebus suis prouenientem, qua vnus indiget, ordinarie gratis per pactum non transferunt, seu *pacta ordinarie gratuita non sunt.* conf. *Illustr. Aut. l. c.*

## §. IX.

Promittens affirmat, se velle uti viribus promisso suo sufficientibus intuitu alterius. (§. 5.) Sed vsus virium nostrarum explendo actui sufficientium diligentiam inuoluit (§. 78. Diss. I.) *Promittens adeo affirmat, se velle alteri in re quadam certum diligentiae gradum exhibere.* conf. *L. 23. in med. ff. de R. l.*

## §. X.

Tria inprimis circa pacta et contractus annotanda veniunt, nimirum ea, quae ex essentia pacti et contractus immediate fluunt, et inde *essentialia* pactorum vocantur; deinde ea, quae quidem vnice et immediate ex essentia pacti non fluunt, ordinarie tamen pacto vel contractui insunt, et *naturalia pactorum* dicuntur; denique ea, quae quidem ef-

sentiae pacti vel contractus non contradicunt, ex eadem autem neque immediate concipiuntur, neque etiam eidem ordinarie adsunt vel insunt, et *accidentalialia* appellantur. conf. STRVVII *Exerc. VI. §. 23. Syntag. Iur. Ciuil.*

### §. XI.

Naturalia pactorum ex essentia eorum immediate haud concipiuntur (§. praec.) Cum autem ea, quae ex essentia alicuius rei vnice et immediate haud concipiuntur, inutabilia sint, vti Philosophus (in Ontol.) demonstrat. Inde nullus dubitat, *quin naturalia pactorum per consensum paciscentium specialem iustum mutari possint.* conf. STRVVII *Syntagm. l. c.*

### §. XII.

Id, quod pacto iusto alteri promissimus, vel repromissimus, rō suum acceptantis fieri in Elementis meis Iuris Ciuil. (§. 102. Praecog.) demonstraui. Verum suum alteri, tribuere officium perfectum, et inde obligationem perfectam determinat (§. 40. Diff. I.) id igitur, quod pacto iusto alteri promissimus vel repromissimus, fit officium perfectum, seu ad illud perfecte obligamur. Cum autem promissiones vel repromissiones consensum nostrum inuoluant, (§. 2. 4.) Hinc prior propositio ad hanc quoque redit; *id, in quod pacto iusto consensimus, fit officium perfectum.* L. 23. in med. ff. de R. I. L. II. §. I. ff. de Acl. emt. vend.

### §. XIII.

Is, qui ei, in quod pacto iusto consensit, disconuenienter moraliter agit, officio perfecto moraliter disconuenienter agit, (§. praec.) Officium perfectum morale, est actio legibus stricte dictis moralibus conformis (§. 15. Diff. I.) Quare is, qui ei, in quod pacto iusto consensit, disconuenienter agit, legibus stricte dictis moralibus disconuenienter agit, et consequenter laesionem perfectam moralem, adeoque damnum morale alteri infert (§. 118, 123. Diff. I.) cum autem ei, qui damnum morale alteri infert, illud et ad reparationem damni et ad poenam imputetur (§. 147. l. c.) Inde constat, quod illi, *qui ei, in quod pacto iusto consensit, disconuenienter agit,*

*agit, inde resultans damnum, et ad reparationem damni dati, et ad poenam imputetur.*

## §. XIV.

Ea, quae rei cuidam ordinarie vel insunt vel adfunt, efficiunt praesumptionem (§. 3.) Cum autem naturalia pactorum sint ea, quae ordinarie pacto et contractui insunt vel adfunt (§. 10.) Hinc constat, quod naturalia pactorum sint ea, in quae paciscentes praesumptive consenserunt. Sed ad ea, in quae pacto iusto consentimus, alteri exhibenda obligati sumus (§. 12.) *Quare ad naturalia pactorum alteri exhibenda perfecte obligati sumus, nisi de alio consensu iusto speciali, ab hoc praesumito diuerso, constet.* (§. 11.) conf. L. 11. §. 1. ff. de Aet. emt. et Vend.

## §. XV.

In omni pacto iusto in quemdam diligentiae gradum consentimus. (§. 9.) Sed ad id, in quod pacto iusto consentimus, alteri praestandum perfecte obligati sumus, (§. 12.) *Quare ex omni pacto iusto et contractu ad certum diligentiae gradum, nimirum ad eum, in quem eodem pacto consentimus, rei conferendum, perfecte obligati sumus.* quam propositionem L. 23. ff. de R. I. exprimit.

## §. XVI.

Is, qui eum diligentiae gradum moraliter intermittit, in quem pacto iusto consensit: ei, in quod pacto iusto consensit, moraliter disconuenienter agit (§. praec.) et consequenter ei, qui eum diligentiae gradum moraliter intermittit, in quem pacto iusto consensit, inde alteri resultans damnum et ad reparationem damni dati, et ad poenam imputari debet. (§. 13.)

## §. XVII.

Si de imputatione culpaе circa contractus sermo est, tum dispiciendum, quandonam culpa commissa, ex contractu nobis imputari potest? et huius imputabilitatis principium adaequatum et certum proxime praecedens propositio est, quam iam in principia, circa pacta iusta, resolui. Inde omnis intermissio diligentiae indeliberata nobis ex pacto

pacto imputari nequit, si in eiusmodi intermissum diligentiae gradum non consensimus (§. 15.) Interea tamen cum damna ex alterius culpa citra respectum ad pacta et contractus nobis suborta, delicta priuata culposa inuoluant (§. 3. et 4. l. 3. t. 9. Elem.) quae, uti in praecedenti Dissertatione §. 155. demonstraui, ex lege Aquilia vindicantur et imputantur. Inde dubium maximum, quod B. THOMASIVS in §. 27. Disputat *de usu practico doctrinae difficillimae Iur. Rom. de culparum praestatione in contract.* format, remouetur. Exinde quidem Thomasius ICtos Romanos obscuritatis accusat; cum tamen ex principiis nostris istis ICtis intellectus Systematicus attribuendus sit illosque, si ad ipsorum tempestatem respicias, omni laude dignos censere possimus.

## §. XVIII.

Is, qui circa pacta iusta dolose agit, omnem diligentiae gradum intermittit, adeoque et eum, in quem pacto iusto consensit (§. 104. Diff. I.) sed ei, qui eum diligentiae gradum moraliter intermittit, in quem pacto iusto consensit, damnum alteri inde resultans, et ad reparationem damni et ad poenam imputari debet (§. 13.) *Quare ei, qui dolose circa pacta iusta agit, damnum inde alteri resultans, et ad reparationem damni dati, et ad poenam imputari debet. L. 23. ff. de R. I. l. 7. pr. l. 5. §. 2. ff. commod.*

## §. XIX.

Qui infimum diligentiae gradum intermittit, omnem diligentiae gradum intermittit, sed qui culpam latam committit, infimum diligentiae gradum indeliberate intermittit (§. 114. Diff. I.). Inde is, qui latam culpam circa pacta iusta committit, omnem diligentiae gradum, adeoque eum quoque intermittit, in quem pacto iusto consensit, et consequenter *damnum alteri paciscenti ex lata culpa vnius resultans, et ad reparationem damni dati et ad poenam imputari debet. (§. 13.) L. 37. ff. dep.*

## §. XX.



## §. XX.

Si vnus contrahens sciens id effectui dare contendit, in cuius abstinentiam consensit; tum contrahens hoc ipso deliberate vitur viribus explendo officio contrariis, (§. 5. 12.) et consequenter eo ipso, quo sciens id effectui dare contendit, in cuius abstinentiam consensit, dolum circa pactum vel contractum committit (§. 78. Diss. I.) Interea tamen in hoc facto illicito, quod contractus in specie ignorat, culpam committere potest. Cum autem is, qui facto suo culposo citra respectum ad pacta rem alterius deteriorem reddit, etiam ex lege Aquilia ad reparationem damni culpa dati obligetur (§. 155. l. c.) Hinc concipiendum cur ICri Romani hoc in casu, quo contrahens sciens factum committit, in cuius abstinentiam consensit, et in cuius peractione, culpa quacunque rem pactitiam singularem deteriorem reddit, concesserint, quoad dolum primum occurrentem, actionem ex contractu, quoad culpam in facto illicito occurrentem, actionem ex Lege Aquilia. *L. 18. §. 1. ff. commod. L. 1. §. 25. ff. deposit. L. 25. §. 4. et 5. ff. Locati Conduct.*

## §. XXI.

Is, qui latam culpam committit, infimum diligentiae gradum indeliberate omittit, (§. 114. Dissert. I.) et consequenter indeliberate nullis prorsus vitur viribus suis explendo officio sufficientibus, (§. 95. l. c.) Sed vsus virium nostrarum explendo officio sufficientium praestruit propositum legibus conuenienter agendi (§. 24. Praecog. Elem. I. C.) Quare qui latam culpam committit, nullum prorsus propositum legibus conuenienter agendi habet. Sed is, qui dolose agit, habet propositum contra leges agendi (§. 102. Diss. I.) id, quod propositum legibus conuenienter agendi tollit. Quare qui latam culpam committit, et qui dolose peccat, in eo conueniunt, quod vtrique nullum prorsus habeant propositum legibus conuenienter agendi: Inde concipimus assertionem legalem; *lata culpa aequiparatur dolo. L. 226. ff. de V. S. L. 32. ff. deposit. L. 1. §. 5. ff. de O. A. conf. B. COCCII Disp. III. §. 5. et 9.*

## §. XXII.

SCHOLION: Homines ordinariè in rebus suis maximum quidem diligentiae gradum non adhibent, attamen in infimo quoque non subsistunt; Vnde pro medio diligentiae gradu praesumptio remanet, (§. 3.) quem homines ordinariè adhibent: Cum autem medius diligentiae gradus sit media diligentia: (§. 114. Diff. I.) Inde media diligentia remanet, quam ordinariè homines in rebus suis adhibent. Verum homines res externas suas in statu civili administrantes dicuntur patresfam. Quare patresfam. ordinariè mediam diligentiam adhibent in rebus suis. Ast quilibet praesumitur bonus in statu civili. Igiturque, pro bono patresfam. media diligentia remanet. Inde adeo ad intelligendum datur, *cur diligentia media ea dicatur, quam bonus paterfam. adhibet.* Et sic diligentia patrisfam. tanquam mensura assumpta fuit, secundum quam et infima et maxima determinari possit. L. 32. ff. de depos. L. 10. ff. de admin. et peric. tutor. L. 47. ff. de Leg. L. 35. §. 4. ff. de contr. emt.

## §. XXIII.

Lata culpa aequiparatur dolo (§. 21.) Sed ei, qui dolose circa pacta iusta agit, semper damnum inde alteri subnatum, imputatur ad reparationem et poenam, (§. 18.) Quare ei, *qui latam culpam circa pacta iusta committit, damnum inde resultans alteri ad reparationem damni et ad poenam attamen paulo minorem, quam si dolo datum, imputatur* (§. 150. Diff. I.) quae est altera demonstratio, ab illa, quae §. 19. data, diversa. L. 23. ff. de R. I. L. 37. ff. dep. COCCII Collat. 13.

## §. XXIV.

Si quantitas B. eodem modo determinatur ex A. quo D. ex C: tum id, ex quo determinatur A. et B. idem est cum illo, ex quo determinatur C. et D. et consequenter inter A. cum B. et C. cum D. deprehenditur similitudo. Verum similitudo inter quatuor quantitates obuia, quarum duae semper ad se invicem referuntur, efficit proportionem (§. 155. Arithm. Illustr. WOLFFII.) Quare si quantitas B. eodem modo determinatur ex A. quo D. ex C. erunt C. et D. ipsae A. et

## CIRCA CONTRACTVS

*A. et B. proportionales. conf. Illustr. WOLFII §. 450. On-  
rol. Lat.*

### §. XXV.

Vtilitas, qua paciscentes a se inuicem indigent, ordinarie causam pactis iustis ineundis dedit, (§. 7.) adeoque cum pactis iustis connexa. Sed certus diligentiae gradus etiam cum pacto iusto connexus, (§. 9.) Inde vtilitas, qua paciscentes a se inuicem indigent, et certus diligentiae gradus ordinarie cum illo tertio, scilicet pacto ineundo, connectuntur. Sed ea, quae cum vno tertio connexa, inter se sunt connexa. Quare vtilitas, qua paciscentes a se inuicem indigent, et certus diligentiae gradus ordinarie inter se sunt connexa; Connexa autem sunt ea, quorum vnum ex altero concipitur seu determinatur. Ex quantitate itaque vtilitatis, qua vnus paciscens ab altero indiget, eodem modo ordinarie certus diligentiae gradus determinatur, quo ex quantitate vtilitatis, qua alter ab vno indiget, ordinarie certus diligentiae gradus alterius determinatur. Verum si quantitas vna B. eodem modo determinatur ex A, quo D. ex C. tum quantitates inter se sunt proportionales. (§. praec.) Vnde constat, *gradus diligentiae, a paciscentibus sibi inuicem praestandos, ordinarie quantitati vtilitatis, ex pacto iusto percipiendae, esse proportionales.*

### §. XXVI.

Paciscentes quidem in diligentiam quamdam pacto iusto consentiunt, (§. 9.) At gradus ipsius diligentiae vnice et immediate ex consensu paciscentium mutuo non determinatur; quoniam tamen ex principiis aliis eruiamus, quod quantitas vtilitatis, quam vnus ab altero percipit, ordinarie proportionalis sit gradui diligentiae (§. praec.) et ea, quae quidem ex consensu paciscentium mutuo vnice et immediate non fluunt, ordinarie tamen pacto insunt, naturalia constituent. (§. 10.) Inde *secundum naturam pactorum in genere quantitas vtilitatis, quam vnus ab altero percipit, proportionalis esse debet gradui diligentiae.* L. §. 2. ff. *commod. conf. STRVVI Synagm. Exercit. 19. §. 36. 40.*

## DE IMPVTATIONE CVLPAE

### §. XXVII.

Ad naturalia pactorum alteri exhibenda ex pacto iusto perfecte obligati sumus, nisi de alio consensu iusto speciali, ab hoc praesumpto diuerso, constet (§. 14.) Sed secundum naturam pactorum gradus diligentiae a paciscentibus sibi inuicem praestandi, quantitati utilitatis paciscentium sunt proportionati, (§. praec.) *Quare paciscentes sibi inuicem ad eum diligentiae gradum, qui quantitati utilitatis proportionalis, exhibendum perfecte obligati sunt, si de alio consensu iusto speciali, ab hoc praesumpto diuerso, haud constet. conf. l. 23. ff. de R. l. et L. §. praec. cit.*

### §. XXVIII.

Gradus diligentiae, ad quem vnus paciscentium alteri perfecte obligatur, est ad gradum diligentiae alterius, vti quantitas utilitatis primi, ad quantitatem utilitatis secundi sub data hypothesi (§. praec.) Ponas itaque quod sub data hypothesi vnus omnem utilitatem ex pacto iusto percipiat, alter autem nullam, tum gradus diligentiae primi summus seu maximus, alterius autem minimus esse debet, ad quem perfecte obligantur. L. 5. §. 2. ff. commod. L. 23. ff. de R.

### §. XXIX.

Gradus diligentiae, ad quem vnus iuste paciscens, sub data hypothesi, perfecte obligatur, est ad gradum diligentiae alterius, vti quantitas utilitatis primi, ad quantitatem utilitatis secundi (§. 27.) Sint itaque quantitates utilitatis paciscentium aequales, tum sub data hypothesi quoque gradus diligentiae vnus aequalis esse debet gradui diligentiae secundi (§. 26.) inde hoc in casu gradus diligentiae satis determinatus esse non videtur. Attamen cum sub priori casu, si vnus maximam utilitatem habet, alter autem nullam: prior maximum, posterior minimum diligentiae gradum praestet: Praesens casus autem a priori diuersus sit; inde quoque, manente hypothesi, diuersa legis dispositio esse debet, adeoque vtrique neque maximum, neque minimum praestant, remanet igitur medius diligentiae gradus, cuius determinatio efficit, vt prioris casus decisio a praesenti distingua-  
tur.

*ant. Ergo si quantitates utilitatis, quam paciscentes pacto iusto percipiunt, aequales, uterque ad medium diligentiae gradum alteri exhibendum perfecte obligatur. L. 5. §. 2. ff. commod. §. 72. l. 3. t. 1. Elem. aliam exhibet demonstr.*

## §. XXX.

Qui occasionem expectandam arripit, vel aliam suscitatur, insignem habet voluntatem efficacem finem aliquem existentiae reddendi, uti demonstrat. Cel. KOEHLERVS §. 529. I. N. Verum is, qui sponte sese pacto vel contractui obtulit, ista oblatione, occasionem expectandam vel arripit, vel quamdam suscitatur intendit, sub qua finis quidam existentiae reddi debet. Ergo is, qui sponte sese pacto obtulit, ista oblatione declarat, se insignem voluntatem efficacem habere actum quemdam existentiae reddendi. Verum voluntas efficax cum usu virium explendo actui sufficientium connexa. Quam ob rem is, qui sponte se se pacto obtulit, ista oblatione declarat, se velle insignibus adeoque pluribus, quam ordinarie, viribus uti explendo actui sufficientibus. Usus virium nostrarum explendo actui sufficientium dicitur diligentia (§. 78. Diss. I.) Is igitur, qui sponte se se pacto vel contractui obtulit, ista oblatione declarat, se velle maiorem quam ordinarium diligentiae gradum alteri exhibere. Maior quam ordinaria diligentia, est diligentia maxima (§. 21.) Is adeo, qui sponte se se pacto obtulit, ista oblatione, declarat, se velle maximam alteri exhibere diligentiam. Oblatio spontanea est factum spontaneum, et voluntas facto declarata efficit consensum tacitum (§. 2.) Unde constat, eum, qui sponte sese pacto, vel contractui obtulit, tacite in maximam diligentiam consensisse, adeoque ad maximam diligentiam praestandam perfecte obligatum esse. (§. 12. et 15.) L. 23. ff. de R. Iur. B. COCCEL Diss. II. p. 85. et Coll. II. §. 10.

## §. XXXI.

Qui negotium pacto iusto in se suscipit, cuius peractio summum diligentiae gradum exigit, ista susceptione declarat, se velle summum diligentiae gradum adhibere; alias enim sine omni spe rei sese immiscet, quod tamen de nullo ra-

tionis cultore dici potest, voluntas susceptione negotii, hoc est, facto declarata, efficit consensum tacitum (§. 2.) Quare is, qui negotium alterius pacto iusto in se suscipit, cuius peractum summum diligentiae gradum exigit, tacite quoque in summum diligentiae gradum consensisse praesumitur, et inde quoque ad maximam diligentiam, isto pacto praestandam, perfecte obligatur, (§. 12, 15.) L. 23. ff. de R. I. L. 27. §. 29. ff. ad L. A. L. 13. §. 5. ff. loc. cond. conf. B. COCCII Disp. II. p. 84. de Praest. Culpa.

## §. XXXII.

Ponas, quod Titius, qui sponte se se contractui obtulerit, nullam tamen vtilitatem ex pacto percipiat, alter autem omnem: tum secundum vnā regulam generalem Titius minimam, secundum alteram generalem autem maximam diligentiam praestaret (§. 27. et 29.) Vnde eo in casu duae regulae generales aequae obseruandae sibi contradicunt: Verum ex ontologia constat, quod eo in casu, quo duae regulae, aequae obseruandae, sibi contradicunt, exceptio ab vtrisque sit faciendā, seu vtrisque aliquid detrahendum: Hinc is, qui sponte se se contractui obtulit, nullam autem plane ex eodem percipit vtilitatem, mediam diligentiam praestare perfecte obligatur. L. 1. §. 35. ff. deposit. conf. LAVTERB. Colleg. Pract. lib. 16. l. 3. §. 31.

SCHOLION: Dubium forsā oriri possit, ac si is, qui vltro sese contractui obtulit, licet nullam perciperet vtilitatem, tamen ad maximam diligentiam obligatus esset, cum scilicet hoc loco alius consensus a praesumpto, quo alius minima determinatur, diuersus sit: adeoque maxima potius, quam minima diligentia exhibenda. Verum cum consensus eius, qui vltro sese contractui obtulit, quo maximā diligentia determinatur, sit tacitus, et consensus eius, qui nullam vtilitatem percipit, quo minima determinatur, sit praesumptus (§. 25. 36.) Consensus vero tacitus et praesumptus in eo continentur, quod ex quibusdam circumstantiis, sub quibus paciscentes constituti sunt, eliciantur (§. 23.) Inde quod quae ex eorum ex consensu praesumpto determinantur, eodem modo veniunt obseruanda, ac ea, quae ex consensu tacito determinantur.

tur, si expresse aliud non conuenerint; Idcirco neutra harum determinationum in totum negligenda, sed utrisque potius aliquid secundum datam decisionem detrahendum, si scilicet expresse aliud non conuenerint paciscentes.

## §. XXXIII.

Res interire dicitur, si illa existere desinit, quae antea existerat. Verum res singulares, seu indiuiduales, quas ICti species vocant, proprie existunt. Vnde constat, quod *interitus rei tantum de re singulari seu specie, minus autem de genere Iuridico praedicari possit.*

## §. XXXIV.

*Merus Casus* apud ICtos idem denotat ac fortuna aduersa, et inde definitur, quod sit euentus dependens a nexu causarum, in alicuius decrementum tendentium, quem praevidere non possumus. Exinde constat, quod casus merus sit euentus, cuius non existentia non est in nostra potestate. Actus cuius non existentia non est in nostra potestate obligationem moralem, exinde culpam et dolum ignorat (§. 10, 86. Diff. I.). Quare id, quod *merò casu contingit, ita comparatum, ut eius non existentia obligationem moralem, culpam et dolum nesciat.* Ponas autem, quod ei, quod casu contingit, actio nostra libera, seu culpa accedat, tum oritur casus mixtus, cuius non existentia eatenus obligationem moralem admittit, quatenus illius actionis liberae non existentia obligationem moralem admittit, conf. B. C. C. CEII Diff. II. §. 19. p. 88. L. 22. ff. ad SCr. Treb.

## §. XXXV.

Vi demonstrationis (§. II. Differt. I.) in apriico est, quod is, qui ad actum quemdam omittendum obligatus est, simul obligatus sit, ad actum priori oppositum existentiae reddendum. Si huius propositionis subiecto et praedicato particula *non* adicitur, secundum regulam in Schol. (§. 97. Diff. I.) datam, haec euadit propositio. *Is, qui ad non existentiam seu abstinentiam actus cuiusdam non obligatus est, simul ad actum priori oppositum existentiae reddendum obligatus non est.*

## §. XXXVI.

## §. XXXVI.

Id, quod mero casu contingit, ita comparatum est, vt illius non existentia obligationem moralem ignoret, (§. 33.) obligatio pactitia est obligatio moralis (§. 39. Diff. I. et 12. h.l.) Id igitur, quod rei pactitiae mero casu contingit, ita comparatum, vt illius non existentia in promittente nullam obligationem pactitiam admittat. Verum is, qui ad non existentiam actus cuiusdam non obligatus est, simul quoque ad actum priori oppositum existentiae reddendum obligatus non est. (§. praec.) Id igitur, quod rei pactitiae mero casu contingit, efficit, vt obligatio pactitia promissum effectui dandi cesset. Res pactitia, cui aliquid mero casu contingit, existere, adeoque res singularis esse debet. (§. 33.) Id igitur, quod rei pactitiae singulari mero casu contingit, efficit, vt obligatio pactitia promissum, casu impeditum, effectui dandi cesset. L. 18. pr. ff. comm. L. 13. §. 1. ff. de pig. act. L. 32. ff. de Neg. gest. L. 4. L. 5. C. de per. tut.

## §. XXXVII.

Id, quod rei pactitiae singulari mero casu contingit, efficit, vt obligatio pactitia promissum, casu impeditum, effectui dandi cesset. (§. praec.) Ponas itaque quod res pactitia singularis vel in totum vel pro parte mero casu interuisset, tum quoque obligatio pactitia, rem vel in totum vel pro parte in alterum transferendi, cessat. L. 23. ff. de R. I. L. 59. ff. locati. Cond. L. 15 §. 2. eod. §. fin. Inst. quib. mod. re contr. L. 52. §. 3. ff. pro socio. §. 3. Inst. de Empt. Vend.

## §. XXXVIII.

Si rei pactitiae singulari casu mixto aliquid contingit, tum illius non existentia obligationem moralem, adeoque pactitiam catenus admittit, quatenus actionis liberae casui tanquam concausae adhaerentis non existentia obligationem admittit (§. 34.) Ponas itaque actionis illius liberae, tanquam concausae, non existentiam esse non existentiam diligentiae, in quam pacto iusto consentimus, tummodo eius, quod rei pactitiae singulari isto casu contingit, non existentia obligationem moralem admittit (§. 15.) Vnde constat, quod dolus, vel



vel lata culpa, tanquam concausa, accedens casui, qui in re pactitia singulari contingit, semper obligationem pactitiam ad reparationem damni inde euenientis admittat. L. 5. C. de pign. ult. L. 5. §. 4. §. 7. ff. commod. §. 3. l. de Emt. V. L. 1. §. 4. ff. de O. et A.

§. XXXIX.

In moram moralem paciscens constitutus dicitur, qui promissum eo tempore existentiae non reddit, quo moraliter obligatus fuit. Cum igitur obligatio moralis praestruat actionem liberam, ad quam existentiae reddendam vires nostrae sufficiunt (§. 18. Diss. I.). Inde paciscens in moram moralem constitutus, non vitur viribus explendae obligationi pactitiae sufficientibus. Verum non visus virium explendo officio sufficientium, sub se comprehendere potest et dolum et culpa cuiusdam gradum (§. 78. l. c.). Quare paciscens in moram moralem constitutus vel dolum vel gradum culpa committit, et consequenter dannum uni ex mora sua morali alteri subortum eatenus ad reparationem damni dari imputatur, quatenus eidem vel dolus vel culpa imputabilis inest. L. 14. §. 1. ff. L. 18. §. ult. ff. de R. V. L. 14. §. 1. et L. 12. §. 3. ff. depos. L. 15. L. 2. C. de per. et commod. rei vend.

§ XL.

Si ad interitum rei pactitiae singularis casualem culpa minus paciscentis quidem, minus tamen tanquam concausa efficiens concurrat, tum in modo interitus et inde vnus malum, ex culpa imputabili alteri subortum, dici nequit (§. 124. Diss. I.) et consequenter interitus rei singularis pactitiae mixtus non efficitur, sed mere casualis permanet, (§. 34.) neque adeo obligationem ad reparationem interitus admittit. (§. 38.) Cum igitur mora imputabilis culpam imputabilem inuoluat (§. praec.) Inde interitus rei singularis pactitiae casualis, cui mora quidem alias imputabilis, minus tamen tanquam concausa efficiens concurrat, obligationem ad reparandum interitum nondum adhuc in altero admittit. L. 14. §. 1. ff. deposit.

## §. XLI.

Genus alicui promissum non existit, adeoque illi nihil inero casu contingere potest (§. 33.) et consequenter praecedentes propositiones ad genus alteri promissum extendi nequeunt.

## §. XLII.

Is paciscentium, qui interitum rei pactitiae singularis in se suscipit, in rem aliam huic singulari aequipollentem alteri conferendam consentit. Res alia pactitia rei cuidam singulari aequipollens, ita comparata esse debet, ut cum singulari sub eodem genere, eodemque pretio contineatur. Quare is paciscentium, qui interitum rei pactitiae singularis in se suscipit, in aliam rem sub eodem genere et pretio contentam, seu, ut aiunt Icti, quantitatem alteri conferendam, consentit. Verum id, in quod pacto iusto consentimus, alteri conferre perfecte obligati sumus (§. 12.) *Quare is paciscentium, qui interitum rei pactitiae singularis in se suscipit, ad aliam rem sub eodem genere et pretio contentam alteri conferendam, perfecte obligatur. L. 6. C. de pign. act. L. 7. §. 15. ff. de pact. L. 39. ff. mand.*

## §. XLIII.

SCHOLION: Et haec sunt principia magis generalia, ex quibus gradus diligentiae circa quodlibet pactum vestitum Iure Romano determinatos eruere scrutabimur. Cuiuslibet autem pacti vestiti notionem eiusque realitatem, omnes enim sunt arbitrarie, ex Elementis Iuris civilis lib. III. t. 2. et sequ. praestruere licebit, ex istis notionibus iudicia intuitiva seu axiomata formare, indeque ad principia supra stabilita reducere volumus, ut prona demum consequentia gradus diligentiae circa quodlibet pactum vestitum determinatus, inferatur. Singula tamen eo ordine recensebimus, quo in Republica Romana obtinuerunt.

## §. XLIV.

Omnes contractus praestruunt pacta iusta ab Imperante approbata, uti (§. 164. Praecog. Elem.) ostendimus. Verum paciscenti in omni pacto iusto damna, dolo vel lata culpa alteri data, ad reparationem damni dati imputantur (§.

18, 19, 22.) Quare ex omni contractu paciscenti damnum dolo vel lata culpa datum ad reparationem damni imputatur. L. 1. §. 7. L. 32. ff. dep. L. 1. §. 5. ff. de O. et A. A. L. 226. ff. d. V. S. L. 23. ff. de R. I. L. 5. §. 2. ff. Commod. L. 27. §. 3. ff. de pact.

## § XLV.

Rerum permutatio seu contractus do ut des, est contractus innominatus, quo paciscentes res sibi proprias externas, in quibus ad pretium vulgare respicitur, in se inuicem transferunt, conf. §. 11. Lib. III. t. 2. Elem: Unde patet, quod ex rerum permutatione uterque paciscentium ordinarie aequalem utilitatem percipiat. Verum si uterque paciscentium utilitatem aequalem ex contractu percipit, uterque etiam ad mediam diligentiam alteri exhibendam perfecte obligatur, et inde ipsi damnum culpa leui datum ad reparationem damni dati imputatur. (§. 29.) Quare in rerum permutatione uterque contrahentium ad mediam diligentiam perfecte obligatur, et inde cuilibet damnum leui culpa datum ad reparationem damni dati imputatur. L. 2. ff. de Rer. perm. L. 5. §. 1. ff. de P. V.

SCHOLION: Discrimen inter contractum innominatum do ut des, et permutationem, quod alii asserunt, cum B. TITIO in obseruat. ad Lauterb. Compend. statuere supersedeo, consentiunt verba vltima L. 5. §. 1. ff. de P. V.

## § XLVI.

Casualis rei pactitiae singularis interitus, cui levis culpa inest, eatenus ad reparationem damni imputatur, quatenus damnum leui culpa datum ex contractu imputatur (§. 36.) Cum autem in rerum permutatione damnum leui culpa datum ordinarie ad reparationem damni dati imputeur (§. præc.) Inde constat, quod, in permutatione rerum, casualis rei singularis interitus, cui levis culpa alterius accedit, ad reparationem damni dati imputeur. L. 17. §. 1. ff. de P. V. arg. §. 3. Inst. de empt. V. L. 23. ff. de V. O.

## §. XLVII.

Casualis rei permutandæ singularis interitus, cui quidem leuissima culpa, minus autem dolus, vel lata, vel leuis culpa inest, ex hoc contractu alteri ad reparationem damni non imputatur, (§. 45, 36.) L. 17. §. 1. ff. de P. V. Quid obtineat si res permutanda non sit res singularis, sed genus numero determinatum, adeoque quantitas iuridica, apparet ex (§. 41.) conf. LAVTERB. *Comp. lib. 19. t. 4.*

## §. XLVIII.

Interitus rei permutandæ singularis casualis ex culpa alterius vel lata, vel leui simul, vel dolo ortus, obligationem ad reparationem damni in altero adhuc admittit. (§. 46, 38.) Mora moralis inuoluit vel dolum vel culpæ cuiusdam gradum (§. 39.) Quare interitus rei permutandæ singularis casualis ortus ex mora vnus, cui vel dolus vel culpa leuis et lata inest, obligationem ex isto contractu ad reparationem damni dati alteri præstandam adhuc admittit. L. 17. §. 1. ff. de P. V. L. 23. ff. de V. O.

COROLL: Quandonam interitus rei permutandæ singularis casualis, cui mora vnus accedit, obligationem ad reparationem non admittat, patet ex (§. 39. 45.) conf. L. 2. C. de R. P. §. 3. *Inst. de emt. Vend. arg. L. 5. §. 2. ff. commod.*

## §. XLIX.

Contractus æstimatorius est contractus innominatus, quo quis alicui rem singularem externam, determinato pretio vendendam, ita tradidit, vt alter vel pretium rei venditæ, vel rem incorruptam restituat. conf. §. 16. lib. III. t. 2. *Elem. L. 1. §. 1. ff. de æstimat.* Cum igitur pacta ordinarie non sint gratuita (§. 8.) inde pretium rei vendendæ, aut ita in contractu æstimatorio ab vno pacifcente determinandum, vt alter pretium maius, quam quod determinatum est, pro re vendenda percipiat; L. 13. p. ff. de P. V. aut aliud commodum in specie alteri conferendum: alias enim alter haud raro rem vendendam recuperaret. Porro quoque

## CIRCA CONTRACTVS.

que tradens commodum quoddam ex hoc contractu percipit, alias enim non tradidisset, si nimirum pretium pro re vendenda magis sibi conueniens non putasset. Hinc adeo apparet, quod ex contractu aestimatorio ordinariè et tradens, et accipiens, vtilitatem praesumtiue aequalem exoptat. Verum paciscentes ad mediam diligentiam sibi inuicem exhibendam, et inde ad culpam leuèi praestandam obligantur, si vtrique vtilitatem aequalem ex contractu percipiunt (§. 29.) *Quare ex contractu aestimatorio et tradens, et accipiens, ad diligentiam mediam sibi inuicem exhibendam, et consequenter ad damna leui culpa data praestanda obligantur, conf. L. 17. §. 1. ff. de P. V.*

### §. L.

Is paciscentium, qui interitum rei pactitiae singularis in se suscipit, isto eueniente, ad aliam rem sub eodem genere et pretio contentam, alteri conferendam, seu ad periculum, vt aiunt, praestandum obligatur. (§. 42.) Res pactitia in contractu aestimatorio est res pactitiae singularis (§. praec.) Is adeo contrahentium, qui in contractu aestimatorio interitum rei vendendae in se suscipit, ad aliam rem sub eodem genere et pretio contentam alteri conferendam, seu ad periculum alteri praestandum, perfecte obligatur. arg. L. 10. §. 1. ff. de Iur. dot.

### §. LI.

**SCHOLION:** Ex eo, quod vel tradens, vel accipiens, circa contractum aestimatorium alterum rogauerit, adhuc inferre non licet, quod rogans interitum rei vendendae in se suscepit, etiamsi ex ista rogatione vltreaneam oblationem inferri posse non negauerim: Quare recte Iustinianus Labionis et Pomponii sententiam, quam in cit. L. 17. §. 1. ff. de P. V. proferret, quod nimirum periculum sit penes rogantem, tanquam valde dubiam, reiecit, et determinauit, quod, vt (§. 49.) asseruimus, ordinariè tantum damna, et inde quoque pericula, quibus leuis culpa inest, sint praestanda: Interea tamen principis (§. 30.) conueniens esset, quod et imper-

toris menti non repugnat; quam qui sua dispositione, ea, quæ ordinarie contractui aestimatorio insunt, respexit; *quod rogans ex eo, quod se se contractui ultro obtulerit, interitum, cui leuissima culpa inest, præstare debeat* (§. 34, 38.).

## §. LII.

Malum nobis ex alterius paciscentis mora, cui dolus, vel lata culpa inest, subortum alteri ad resarciendum interesse imputatur (§. 150, 127. Diff. I.). Quare alteri qui in mora est in restituendo pretio, pro re vendita, accepto, cui dolus vel lata culpa vel leuis inest ad resarciendum interesse obligatur. (§. 39.).

## §. LIII.

Ad alium contractum innominatum, qui formula *do, ut facias*, vel *facio ut des* insignitur, progredimur. Inuoluit ille contractum bilateralem pro actionibus alteri propriis, nobis conferendis, rem nobis propriam externam, cui pretium tantum vulgare inest, in alterum transferendi, cuius notionis realitatem in §. 13. lib. III. tit. 2. Elem. euicimus. Ex hac notione apparet, quod vnus aliquid ex actionibus alteri propriis proueniens, alter autem pro hoc rem externam accipiat: adeoque ordinarie vtrique vtilitatem aequalem percipiunt. Verum si vtrique vtilitatem aequalem contractu percipiunt, vtrique ex eodem ad diligentiam mediam sibi inuicem exhibendam obligantur: si nimirum de alio consensu speciali, a præsumto diuerso, non constet (§. 129.). Inde adro liquet, quod ex contractu innominato *do ut facias*, vtrique ad diligentiam mediam sibi inuicem exhibendam obligentur. L. 17. §. 2. ff. de Praesc. V.

## §. LIV.

Si vnus paciscentium vel omnem, vel maiorem, alteri autem vel nullam, vel saltem minorem vtilitatem ex pacto iusto percipit, ille ad maximam, hic ad minimam diligentiam obligatur, si naturalia pactorum alio dissensu non sint mutata (§. 27, 28.). Quare si ex contractu innominato *do, ut facias*,

*facias, is, qui dedit, omnem, vel longe maiorem utilitatem percipit; alter autem vel nullam, vel longe minorem: tum quoque ex isto contractu, is qui dedit, ad diligentiam maximam, alter autem ad dolum et latam tantum culpam obligatur (§. 53.) id quod expresse L. 17. §. 2. ff. de Praescr. Verbi determinat.*

## §. LV.

Si res pactitia singularis casu, cui culpa vnus inest, eo peruenierit, vt alteri exhiberi non possit, tum obligatio pactitia ad interesse eatenus ponitur, quatenus culpa ista obligationem pactitiam ex pacto admittit, (§. 34, 38.) Verum in contractu do, vt facias, vterque paciscentium ordinario ad mediam diligentiam, adeoque ad praestationem culpa levis obligatur. (§. 53.) Inde, si factum promissum simul singulare sit, is, qui istud factum casu, cui ipsius culpa levis inest, praestare nequit, ad interesse obligatur; huc quoque referas moram imputabilem, in quam alter constitutus, (§. 39.) Et contra, si idem factum singulare ponitur, quod quidem casu, cui tamen culpa vel nulla, vel leuissima tantum inest, exhiberi nequit: tum obligatio quoque ad interesse cessat. conf. L. 5. §. 1. ff. de Praesc. V.

## §. LVI.

Contractus innominati do vt facias, et facio vt facias si ab vno priori adimpleti, inter se inuicem conueniunt; et consequenter ex contractu quoque facio vt facias, vnus adimplens contractum exigit interesse; si alter culpa leui eo peruenierit, vt factum illud singulare casu etiam impeditus praestare non possit (§. 55, 53.) minus autem, si alter vel nulla vel saltem leuissima culpa eo peruenierit, vt factum praestare non possit.

## §. LVII.

Instituto nostro conuenienter ex §. 22. Lib. III. 1. 2. Element. assumimus definitionem mutui, quod sit contractus realis, quo res fungibilis nobis propria, ita in alterum transfertur,

feretur, vt alter post tempus determinatum aliam rem fungibilem eiusdem generis et pretii nobis restituat.

## §. LVIII.

Vsura est quantitas quaedam vtilitatis ex re mutuo data proueniens, alteri conferenda. Consentit notio Illustr. RECHENBERGII *L. 2. t. 8. §. 33. Iur. Natur.* prolata. Cum igitur essentia mutui in pacto consistat, quo quis rem sibi propriam iam tradendam promittit, vt alter post tempus aliam rem eiusdem generis et pretii restituat (§. p. 11. c. 3.) Inde constat, quod per essentiam mutui vnice et immediate nulla determinetur quantitas vtilitatis, ex re mutua prouenientis, alteri conferenda. Verum id, quod vnice et immediate ex essentia rei determinatur attributum vocant. Quare *usurarum praestatio non pertinet ad attributa mutui.*

## §. LIX.

Pacta gratuita ordinarie non sunt (§. 8.) Inde si statum naturalem spectaueris, ordinarie nec debitor omnem, quae ex re mutuo data deriuatur, nec creditor omnem vtilitatis quantitatem percipere debet (§. 57.) Adeo, si statum naturalem spectaueris, quaedam vtilitatis quantitas, nimirum dimidia, ex re mutuo data prouenientis, creditori ordinarie erit conferenda. Cum autem ea, quae pacto vel contractui ordinarie adsunt, etiam si ex essentia vnice et immediate non determinentur, naturalia constituent (§. 10.) et quaedam vtilitatis quantitas, ex re mutuo data prouenientis, alteri conferenda, vsuras efficiat (§. 58.) Inde concludere liceret, quod ad naturalia mutui, si statum naturalem spectes, pertineant vsurae, pars vtilitatis, quae ex re mutuo data deriuatur, dimidia, proportionatae (§. 24.) Cum autem quantitas totalis vtilitatis ex re mutuo data deriuatae, propter deficientem debitoris veracitatem, vix accurate determinari possit. Inde quoque, ad amputandas occasiones litium, vsurae non tam ad naturalia mutui referri, quam potius paciscentium promissioni, tanquam accidentalibus relinqui potue-



*potuerunt.* Sed pacta nuda apud Romanos nullam obligationem civilem producant, nisi sint pacta in continenti contractui adiecta (§. 33. Elem.), quae tamen ex post facto demum naturam contractuum nacta fuerunt. §. 34. l. c. Quare *usurae in Republica imprimis Romana non nisi ex stipulatione valide exigi potuerunt, etiamsi ex post facto pactis in continenti adiectis contractibus constitui valide potuissent, nisi usurarum postea pullulantem prauitatem reprimere annisi fuissent.* L. 3. C. de Usur. L. 24. ff. P. V. Rec. imp. de ann. 1577. et de anno 1634.

## §. LX.

Mutuum est contractus realis, quo res fungibilis nobis propria ita in alterum transfertur, ut alter post tempus determinatum aliam rem fungibilem eiusdem generis et quantitatis pretii nobis restituat. (§. 57.) Ex qua definitione apparet, quod is, cui res fungibilis traditur, sub data hypothese, seu debitor solus, si notionem mutui in se spectaueris, ex re mutuo tradita utilitatem percipiat, creditor autem minus. Verum ex contractu iusto, quo vnus paciscentium omnem seu maximam, alter autem vel minimam, vel plane nullam percipit utilitatem, vnus ad maximam, alter ad minimam diligentiam, sibi inuicem exhibendam, obligatur, (§. 28.) Quare ex mutuo in se spectato debitor ad maximam, creditor tantum ad minimam diligentiam exhibendam, adeoque debitor ad culpam leuissimam, creditor ad latam culpam obligatur. arg. L. 2. C. de Peric. et comm. rei. Vend.

## §. LXI.

Usurae circa mutuum creditori vel per stipulationem, vel per aliud pactum in continenti adiectum promissae, efficiunt, ut creditor eandem ex mutuo ac debitor percipiat utilitatem. (§. 59.) Verum vtrique paciscentes tum demum ad mediam diligentiam exhibendam, et inde ad culpam leuem datam praestandam, obligantur, si vtrique eandem utilitatis quantitatem percipiant, (§. 29.) Quare usurae circa mu-

D

tuum

*rum promissæ efficiunt, ut creditor et debitor ex mutuo ad diligentiam mediam exhibendam, adeoque ad culpam leuem sibi inuicem præstandam, obligentur.*

### §. LXII.

*Res mutuo data est res pactitia quidem, minus autem singularis, cum rem eiusdem generis et pretii restituendam præstruat (§. 57.). Verum casualis rei pactitiæ, sed singularis interitus obligationem pactitiam tantum tollit (§. 36, 41.). Quare casualis etiam rei mutuo datæ interitus obligationem debitoris non tollit. L. 11. C. si emt. petat.*

### §. LXIII.

*Debitor post tempus mutuo determinatum creditori non soluens obligationem pactitiam creditori debitam violat, (§. 57, 12.) et consequenter creditorem perfecte lædit (§. 13) adeoque mala ex mora hacce morali creditori obuia, quæ cum læsione coniuncta sunt, et inde damna infert (§. 123. Diss. I.) quæ, cum sint reparanda (§. 144. l. c.) Inde debitor post tempus mutuo determinatum non soluens ad reparanda damna ex mora sua creditori obuia obligatur.*

### §. LXIV.

*Commodatum est contractus realis, quo vsum rei determinatum in alterum gratis ita transferimus, ut alter nobis rem in specie, seu indiuidualem, post vsum restituat conf. §. 30. l. III. t. 3. Elem. quo notionis realitatem euicimus. Is qui in commodato vsum rei determinatum alteri confert, Commodans, et alter, cui vsum confertur, Commodatarius audit.*

### §. LXV.

*Promissum rebus vel operis ab altero nobis conferendis minus æquale honorarium dicitur. Quoniam igitur promissum rebus vel operis ab altero nobis conferendis æquale pactum onerosum efficit §. 79. l. 3. t. 1. Elem. I. C. Inde constat, quod honorarium, contractui accedens, contractum vel*

*vel saltem in totum non efficiat onerosum, potius vero vel ex parte gratuitum esse finit. arg. L. 6. pr. ff. mand.*

## §. LXVI.

Commodatarius ex commodato in se spectato vsum rei alterius determinatum gratis percipit, (§. 64.) adeoque commodatarius ex commodato in se considerato omnem vel saltem maximam percipit vtilitatem, commodans autem nullam. Verum ex contractu, quo vnus omnem, alter autem nullam percipit vtilitatem, prior ad maximam diligentiam, et inde ad praestandam culpam leuissimam, alter vero ad minimam diligentiam exhibendam, adeoque ad praestandam alteri culpam tantum latam obligatur. (§. 28.) *Quare commodatarius ex commodato in se considerato, ad maximam diligentiam exhibendam, et inde ad praestandam alteri leuissimam culpam, commodans autem tantum ad latam culpam obligatur. L. 5. §. 2. L. 18. pr. et 3. ff. commod.*

## §. LXVII.

SCHOLION: Quoniam praestatio culpaе quantitati vtilitatis ordinarie proportionalis. (§. 25.) Inde cum commodans ex commodato in se spectato plane nullam percipiat vtilitatem, inferendum esset, quod commodans ex eodem ad plane nullam diligentiam obligaretur; attamen cum in omni contractu, quidam saltem licet infimus diligentiae gradus sit praestandus (§. 9.) et abstinendum sit ab omni dolo. (§. 18.) Inde in commodato etiam lata quidem culpa praestanda, sed circa eam *remissus* est procedendum, ita vt lata culpa non vt dolus, sicuti ordinarie obtinet, consideretur, neque adeo ad poenam, sed tantum ad reparationem damni, cum alias lata culpa non solum ad reparationem damni, verum quoque ad poenam imputetur (§. 50. Diss. I.) *L. 18. §. 3. ff. commod. L. 61. §. 6. ff. de furt.* quam Legem Cuiacius ad African. p. 534. interpretatur.

## §. LXVIII.

Si commodato honorarium accedit: tum modo vel commodans licet non aequalem cum commodatario, tamen ali-

qualem percipit ex commodato vtilitatem (§. 64. 65.) Cum autem tum demum contrahentes ex contractu ad præstandam culpam leuem obligentur, si vtrique æqualem percipiunt ex contractu vtilitatem (§. 29.) Inde inferre licet, quod ex commodato, cui honorarium accedit, vtrique contrahentes ad leuem culpam sibi inuicem præstandam, vel saltem commodans ad paulo maiorem diligentiam, quam minima est, commodatarius autem ad paulo minorem, quam maxima est, obligantur L. 5. §. 2. ff. Commod. non repugnat.

## §. LXIX.

Quam diu merces seu pecunia vsui, ex re commodata deriuato, proportionalis seu æqualis, commodato haud accedit, tam diu commodatum naturam suam retinet, et in locationem conductionem non mutatur, vti ex notionibus horum duorum contractuum, et in primis ex (§. 34.) lib. III. t. 4. Elem. apparet. Quare commodatum in gratiam seu vtilitatem vtriusque commodantis æque, ac commodatarii initum, si merces adhuc non interuenerit, commodati naturam retinet, et in locationem conductionem adhuc non mutatur. Interea tamen ex hoc commodato, quodammodo irregulari, vtrique contrahentium æqualem percipiunt vtilitatem, inde quoque vtrique et commodans et commodatarius ex commodato, in vtriusque gratiam inito, ad diligentiam mediam sibi inuicem exhibendam, adeoque ad culpam leuem præstandam tantum obligantur, secund. (§. 29.) L. 5. §. 2. commodati. COCCEII Collat. II. §. II.

## §. LXX.

Commodatum, quod in solius commodantis gratiam seu vtilitatem initum est, retinere potest naturam et essentiam commodati (§. præc.) ex eodem tamen commodans solus mediate scilicet per commodatarium percipit vtilitatem. Vnde quoque ex commodato, in gratiam seu vtilitatem solius commodantis inito, commodans ad culpam leuissimam

*nam, commodatarius autem tantum ad latam culpam prae-standam obligatur (§. 28.) L. 5. §. 10. L. 18. pr. ff. commod. conf. Illustr. RECHENBERGII Tract. de Reg. Iur. priu. L. III. t. 6. §. 3.*

## §. LXXI.

*Res commodata est res pactitia singularis (§. 64.) Quare interitus rei commodatae mere casualis ordinarie obligationem pactitiam commodatarii tollit. (§. 36.) L. 18. pr. ff. L. 20. et L. 33. ff. commod.*

## §. LXXII.

*Interitus rei pactitiae singularis casualis, cui culpa contrahentis inest, eatenus imputatur, quatenus culpa imputatur (§. 34. 28.) cum autem (§. 66, 68, 69, 70.) culpam erui- mus, quae sub diuersis determinationibus commodatario imputanda venit. Hinc quoque ope (§§. cit.) constat, sub quibusnam determinationibus casualis rei commodatae interitus, cui culpa commodatarii inest, commodatario ad reparationem damni imputari possit. L. 5. §. 4. ff. commod. conf. Illustr. RECHENBERGII l. c. §. 13.*

## §. LXXIII.

*Commodatarius rem commodatam sciens in alium usum, quam qui pacto determinatus, adhibens dolum committit (§. 5. 12. h. l. et §. 78. Diss. I.) Ponas itaque, rem commodatam ex isto alio usu, quam qui commodato determinatus, accedente quidem casu interire; tum deprehendimus interitum rei commodatae casualem ex dolo commodatarii simul ortum, et consequenter commodatarius commodanti ad reparandum damnum obligatur, (§. 38.) L. 5. §. 7. ff. commod.*

## §. LXXIV.

SCHOLION: Licet commodatarius in ipso usu, di-

uerſo ab eo, quem commodans commodato determinauerit, culpam vel leuiſſimam, vel plane nullam commiſerit, quorum lex citata reſpicit, tamen eo ipſo, quo rem commodatam ſciens in alium uſum, ab eo diuerſum applicat, qui commodato determinatum, dolum committit vel latam culpam, indeque damnum commodanti, etiam citra reſpectum ad commodatum, datum eſſet, adeoque etiam *Lege Aquilia vindicari poſſet.* (§. 20.) *L. 18. §. 2. ff. commod.*

## §. LXXV.

Si commodans commodatario rem ad uſus domeſticos dederit, et commodatarius eam peregre ſecum portauerit; tum commodatarius rem in aliam uſum diuerſum ab eo adhibet, quam qui commodato determinatur. *Vnde commodatarius rem ad uſus domeſticos accipiens, et peregre ſecum portans, ad periculum etiam commodanti præſtandum obligatur.* (§. 73.) *L. 18. pr. ff.*

## §. LXXVI.

Is contrahentium, qui interitum rei paſſitiæ ſingularis in ſe ſuſcipit, iſto eueniente ad rem aliam ſub eodem genere et pretio contentam alteri conferendam, ſeu ad periculum, ut aiunt, præſtandum obligatur (§. 42.). Res commodata eſt res ſingularis paſſitiæ (§. 64.). Quare commodatarius interitum rei ſingularis commodatæ in ſe ſuſcipiens, iſto eueniente, ad rem aliam ſub eodem genere et pretio contentam commodanti reſtituendam, ſeu ad periculum præſtandum obligatur, conf. *L. 5. §. 3. ff. commod. Illuſtr. RECHENBERG. Tract. l. c. §. 13.*

## §. LXXVII.

Si commodans rem commodandam prius æſtimat, iſta æſtimatione, tanquam facta, declarat, ſe velle, ut commodatarius interitum rei forſan euenientem, ſuſcipiat: Inde commodatarius rem commodatam æſtimatam recipiens, iſta  
re-

receptione quoque declarat, se velle interitum rei commodatae in se suscipere. Quare *commodatarius rem commodatam aestimata accipiens ad periculum praestandum obligatur* (§. praec. et 44.) *L. 5. §. 3. ff. commod.*

## §. LXXVIII.

Si res commodata deterior apud commodatarium reddita; tum pars intensa perfectionis rei interiit; consentit *L. 3. §. 1. ff. proprie res commodata non reddita dicitur, quae deterior reddita.* Vnde ea, quae (§. 72. 73.) de interitu rei commodatae in genere eruimus, veniunt *ad deteriorationem apud commodatarium obuiam applicanda.* *L. 10. ff. commod.*

## §. LXXIX.

Interitus rei singularis pactitiae, casualis quidem, simul tamen ortus ex mora alterius imputabili, alteri ad reparationem damni imputatur (§. 39.) Quare interitus rei commodatae casualis quidem, simul tamen ex mora commodatarii imputabili ortus, eidem commodatario ad reparationem damni imputatur (§. 64.) Cum autem commodatarius post usum determinatum finitum, et interpellationem in moram moralem constituitur, et commodatarius etiam ad leuissimam culpam praestandam obligetur (§. 64. 66.) inde apparet, *quandonam in moram moralem constituetur commodatarius, et quod omnis mora moralis ipsi sit imputabilis ad reparationem.* *C. VII. X. de commod. conf. Illust. RECHENBERGII Tr. l. c. §. 13.*

## §. LXXX.

Quilibet paciscens in id, per quod eius quaeritur utilitas, consensisse praesumitur (§. 3.) Cum autem impenae etiam extraordinariae, quas commodatarius, ad rem ab interitu conseruandam, contulit, sint ea, per quae utilitas commodantis quaeritur. Inde constat, quod commodans in impen-

impensas extraordinarias, ad rei conseruationem necessarias, conseruerit. Ad id, in quod pacto iusto seu contractu consentimus, alteri praestandum perfecte obligati sumus. (§. 12.) *Quare commodans ad impensas, ad conseruationem rei commodatae necessarias, extraordinarias commodatario praestandas perfecte obligatus est. L. 18. §. 2. ff. commod.* Quid quod, si commodatarius eas conseruationi rei commodatae denerauerit, et res interierit; tum ea culpa commodatarii interiiisset, unde ad damni reparationem commodanti obligatus esset (§. 72.).

## §. LXXXI.

*Depositum* tertio inter contractus reales loco collocatur, huiusque notionis realitatem quod sit contractus realis, quo alteri custodiam rei nobis traditae gratis promittimus, §. 34. lib. III. t. 2. *Elem.* iam iam euicimus. Determines rem vel litigiosam vel minus, et alterum, qui vel dominus, vel iudex esse potest: Accipies species Depositum: quarum *prima* Depositum simplex constituit, quo domino custodiam rei traditae ininus litigiosae gratis promittimus, *altera, sequestrum voluntarium*, quo domino custodiam rei litigiosae, nobis traditae, gratis promittimus, *tertia, sequestrum necessarium*, quo iudici custodiam rei litigiosae, nobis traditae, gratis promittimus. L. 7. §. f. ff. qui satisd. cog. conf. B. COCCEII *Ius controu. Lib. 10. t. 3. q. 17.*

## §. LXXXII.

In deposito simplici dominus rei deponens custodiam rei suae ab altero expectat (§. praec.) adeoque rem apud se saluam et incolumem seruari non posse metuit; (alias enim, custodiam rei, alteri committendo, rem suam cuidam saltem periculo vel ratione restitutionis non exposuisset.) Unde deponens dominus semper aliquod rei suae periculum imminere metuit: Id quod periculum rei imminens vel inopinatum et subitaneum est, vel minus. Si prius por-  
nas



nas depositum miserabile efficitur, quod contractum inuoluit, quo ob periculum inopinatum et subitaneum rei imminens alteri custodiam rei nobis traditae gratis promittimus: Si posterius, *depositum simplex* vel etiam sequestrum voluntarium vulgare prodire potest. (§. praec.) L. 1. §. 1. ff. de pos.

## §. LXXXIII.

Honorarium contractui gratuito accedens ipsum contractum totum non efficit onerosum sed ex parte tantum (§. 65.) Depositum est ordinarie contractus gratuitus (§. 81.) Quare honorarium deposito accedens illud non quidem in totum sed tantum ex parte reddit onerosum L. f. ff. de pos. L. 2. §. 24. ff. vi bon. rapt.

## §. LXXXIV.

Deponens ex deposito ordinarie omnem utilitatem percipit, depositarius autem nullam (§. 81.) Quare deponens ex deposito ordinarie ad leuissimam culpam praestandam obligatur, depositarius autem ad latam circa custodiam rei obuenientem (§. 28.) L. 1. C. de pos.

## §. LXXXV.

Ex deposito, cui honorarium accedit, depositarius quandam, licet in totum non aequalem, ac deponens percipit utilitatem (§. 83. & 65.) Verum ex contractu quo vtrique aequalem percipiunt utilitatem, vtrique ad culpam leuem obligantur (§. 29.) Quare ex deposito, cui honorarium a deponente accedit, vtrique ad leuem culpam vel saltem depositarius ad paulo maiorem diligentiam, quam minima est, deponens autem ad paulo minorem quam maxima est obligantur L. 5. §. 2. ff. commod. LAUTERB. Colleg. pract. L. 3. §. 4. Illustr. RECHENBERG. Tr. l. c. t. 1. §. n.

## §. LXXXVI.

Is, qui vltro se se contractui obtulit, ex quo tamen nullam percipit vtilitatem ad mediam diligentiam et inde et ad leuem culpam praestandam perfecte obligatur. (§. 32.) Depositarius ex deposito ordinarie nullam percipit vtilitatem (§. 81.). Quare *depositarius vltro sese deposito offerens, ad mediam tantum diligentiam deponenti exhibendam, et inde ad praestandam leuem tantum culpam obligatur* C. 2. X. dep. l. 1. §. 35. ff. dep. conf. LAVTERB. Colleg. Pract. tit. 10. l. 3. §. 31.

## §. LXXXVII.

Quilibet ex instinctu naturali alterius (minus inimici) calamitatis, qua alter absque culpa sua afflictatus misereri duce experientia praesumitur. (Quippe cum et illud experientia in durissimis et tortuosis alias ingeniis comprobatur.) Cum autem misericordia secundum eius notionem in nos excitet conatum efficacem alteri fortuna aduersa afflictato viribus nostris succurrendi, §. 461. Metaph. Illustr. WOLFFII. Inde quilibet praesumitur conatum efficacem habere alteri, (minus inimico,) et fortuna aduersa absque culpa sua afflictato, succurrendi. Verum enim vero in deposito miserabili depositarius futurus deponentem minus inimicum, nam inimicitia haud praesumitur, absque culpa sua vel saltem intuitu rerum subitaneo et inopinato periculo adeoque fortunae aduersae expositum deprehendit. (§. 82.) Unde inferre licet, quod in deposito miserabili depositarius habuerit conatum efficacem deponenti eiusque rebus succurrendi. Sed qui conatum agendi cumque efficacem habet, vltro agit. Quare in deposito miserabili praesumitur, depositarius quod sese deposito vltro obtulerit. Verum depositarius sese vltro deposito offerens ad leuem culpam praestandam obligatur (§. 86.) Quare *depositarius in deposito miserabili ad leuem culpam praestandam*

IVXXXI.2

*obligatur. L. 1. §. 35. ff. de pos. conf. LAVTERB. Colleg. Prae-  
dic. l. c.*

## §. LXXXVIII.

Quilibet paciscens ad eum diligentiae gradum ex pacto obligatur in quem eodem pacto consentit. (§. 19.) Dantur pacta et contractus, quibus tantum in custodiam rei traditae consentimus. Quae duae propositiones, quarum una omnes contractus, altera contractus speciales custodiam rei exigentes respicit, si addantur propositionem inde resultantem compositam veram efficiunt. Inde inferre licet, *quod contrahens in contractibus custodiam rei exigentibus ad eum diligentiae gradum circa custodiam rei ex contractu obligetur in quem eodem contractu consentit.* conf. B. STRVVII Exerc. 19. §. 28. et 29. Vnde contrahens in contractibus custodiam rei exigentibus culpam citra respectum ad custodiam committit, non quidem ex contractu, sed citra respectum ad illum ad reparationem damni culpa dati obligatur (§. 150. Diss. I.) Cum autem damnum culpa quidem, sed citra respectum ad contractus datum lege Aquilia vindicatur, (§. 155. l. c. et 20. h. l.) Inde constat quod contrahentes in contractibus custodiam rei solum exigentibus, culpam vel dolum citra respectum ad custodiam committentes non tam ex contractu, quam potius ex lege Aquilia ad reparationem damni dati obligentur. L. 25. §. 4. et 5. ff. locati.

## §. LXXXIX.

Depositum est contractus custodiam rei depositae exigens a depositario (§. 81.) Quare depositarius rem depositam facto suo culposo citra respectum ad custodiam deteriorem reddens, non tam ex deposito, quam potius ex lege Aquilia obligatur ad damni culposa deterioratione dati reparationem. (§. praec.) L. 18. §. 1. ff. commod.

**SCHOLION:** Pespicias quæso B. L. quomodo hocce Spho alia difficultas, quam B. THOM. in cit. Disputat. §. 27. obiecit ope principiorum supra stabilitorum remoueri potuit. Interea tamen depositarius isto facto in se culposus e. gr. vñ rei depositæ, ordinarie sciens eidem in quod pacto iusto consensit, disconuenienter agit, et propter dolum simul ex deposito conueniri potest. (§. 20.)

### §. XC.

Interitus rei pactitiæ singularis mere casualis obligationem tollit pactitiã (§. 36.) Res deposita est res singularis pactitia (§. 81.) Quare *interitus rei depositæ mere casualis obligationem depositarii tollit. L. 1. C. deposit.*

### §. XCI.

Diligens paterfamilias in periculo rem maioris pretii viliori præfert: Diligentia, quam paterfam. ordinarius in rebus suis adhibet, est media. (§. 22.) Quare *depositarius in communi periculo rem suam maioris pretii viliori depositæ præferens mediam diligentiam adhuc non intermittit.* Sed contra rem suam viliozem rei depositæ maioris adhuc pretii præferens intermittit demum diligentiam mediam. Cum autem depositarius in deposito ordinario tantum ad latam culpam in miserabili autem ad leuem deponenti præstandam obligetur, (§. 84. 87.) et intermissio diligentiae mediae indeliberata sit levis culpa, (§. 114. Diff. I.) Inde constat, quod *depositarius in deposito ordinario nec quidem ad reparationem damni obligetur licet rem suam viliozem rei depositæ maioris pretii prætulerit; ad quam tamen obligari posse videtur in deposito miserabili.* conf. B. TITII *lus pr. lib. IV. C. 12. §. 15.* et PVFFENDORFF *I. N. et Gent. lib. V. c. 4. §. 7.*

### §. XCII.

Interitus rei pactitiæ singularis ex casu quidem quoad partem et ex culpa alterius ortus eatenus alteri ad reparationem

longem damni imputatur, quatenus ipsi culpa imputatur. (§. 34, 38.) Res deposita est res paucitia singularis (§. 81.) et depositarius ordinarie ad latam culpam, in miserabili ad leuem obligatur. (§. 84, 87.) Quare *interitus rei depositae ex casu quidem et simul ex culpa lata in ordinario, et leui in miserabili ortus, depositario ad reparationem damni dati imputatur.* L. 1. §. vlt. ff. deposit.

§. XCIII.

Morae morali semper vel dolus vel culpa quaedam speciei inest (§. 39.) Unde apparet quod *interitus rei depositae casu quidem, quodammodo ex mora tamen morali depositarii ortus tum demum depositario imputetur, cum apparuerit, huic morae morali dolum vel culpam quandam depositario imputandam inesse* (§. praec.) L. 1. §. 22. ff. deposit.

§. XCIV.

*Pignus est contractus realis de re nobis propria in alterum in securitatem crediti sui transferenda* §. 36. l. 3. t. 2. Elem. Cum igitur creditor securitatem crediti sola possessione obtinere possit, istaque possessio usum rei adhuc non inuoluat. Inde debitor pignore in se spectato in usum rei creditori conferendum non consentit, et consequenter usus rei oppignoratae alteri creditori conferendus ad accidentalia pignoris pertinet. (§. 11.) Verum accidentalia contractus pacto in continenti adiecto vel stipulatione ciuilitur valide, et pacto ex interuallo adiecto naturaliter valide in quolibet contractu promitti possunt, (§. 31. lib. 3. t. 1. Elem.) *Quam ob rem usus rei oppignoratae in vicem usurarum pacto in continenti adiecto vel stipulatione ciuilitur valide promitti potest.* Inde *pactum anticrifeos ortum.* L. 2. §. 2. ff. de pign. et hypoth.

§. XCV.

Ex contractu pignoratitio creditor vel saltem securitatem crediti, accedente autem pacto anticrifeos usum quemdam

dam in vicem vsurarum, debitor autem ope alterius praeuii contractus e. g. mutui aliam vtilitatem percipit (§. 94.) Quare ex contractu pignoratitio vtrique paciscentes vtilitatem quamdam licet non semper, tamen plurimis in casibus aequalem percipiunt. Nam si etiam pactum antichristicos non accedat, tamen vti Romanorum historia et nostra experientia comprobant, creditores ex quantitate mutui partem quamdam in vicem vsurarum detrahare consueſcunt. Cum autem paciscentes vtrique vtilitatem ex contractu capientes, licet in totum aequalis non sit, ad mediam diligentiam sibi inuicem exhibendam et ad praestandam culpam leuem obligentur. (§. 29.) *Inde ordinarie creditor et debitor ex contractu pignoratitio ad mediam diligentiam sibi inuicem exhibendam, et ad praestandam sibi inuicem culpam leuem obligantur. §. ult. Inst. quib. mod. re. contr. L. 14. ff. L. 22. §. 5. de pignor. act. L. 19. C. de pign. et hypoth.*

## §. XCVI

Contractus pignoratitius in se spectatus custodiam rei oppignoratae a creditore exigit (§. 94.) Quare creditor rem oppignoratam facto suo etiam culposo, circa respectum ad custodiam, deteriore reddens, non tam ex contractu pignoratitio, quam potius ex lege Aquilia ad reparationem damni ista culposa deterioratione dati obligatur. (§. 88.) *L. 12. §. 1. ff. commod. L. 7. ab initio C. de pignor. act.*

## §. XCVII

Creditor in pignore in se spectato in custodiam rei oppignoratae, et abstinentiam ab vsu rei consensit (§. 94.) Quare creditor in pignore ordinario ei, in quod pignore consensit sciens disconuenienter agit; si re oppignorata vritur, et consequenter dolum committit (§. 100. Diff. I. et §. 12. h. l.) Ponas itaque, quod isto vsu res oppignorata deteriore reddita, tum creditor debitori dolo damnum infert, cuius reparatione etiam actione pignoratitia exigi potest a debitore. *L. 7.*

*in med. C. de pign. act. L. 13. §. 1. ff. eod. L. 19. C. de pign. et hypothec.*

## §. XCVIII.

Res oppignorata est res pactitia singularis (§. 94.) fed interitus rei singularis pactitiae mere casualis obligationem pactitiam tollit (§. 36.) *Interitus adeo rei oppignoratae mere casualis obligationem creditoris tollit. §. ult. Inst. quib. mod. re. contr. L. 13. §. 1. ff. de pign. act. L. 19. C. de pignor. et hypoth. L. 9. pr. C. de pign. act.* Deterioratio rei partialem quemdam interitum inuoluit (§. 78.) et creditor ad praestandam culpam leuem obligatur (§. 95.) *Creditor igitur, qui rem oppignoratam leui sua culpa, circa custodiam, deteriorauerit, ad dampnum debitori reparandum obligatur. L. 3. C. de pign. act.*

## §. XCIX.

Morae morali vel dolus vel quidam culpa gradus inest. (§. 39.) *Quare interitus rei oppignoratae casu quidem, sed simul ex mora creditoris ortus, in quam post solutionem debiti constituitur, creditori eatenus imputatur, ad reparationem damni, quatenus huic morae dolus et culpa ipsi imputanda inest. (§. 34. 38.)*

## §. C.

Creditor debitori, ad diem determinatum, non soluenti, rem quamdam, citra debitoris consensum, propria vi auferens, cum debitore isto quidem, propter deficientem consensum, contractum pignoratitium non init; attamen propria vi debitorem ad adimpletionem obligationis cogere intendit. Cum vero is, qui in statu ciuili ordinario alterum obligatum, absque imploratione magistratus, vi propria cogit, delictum committat. conf. §. 66. l. III. t. 9. Elem. Inde constat, quod creditor debitori ad diem non soluenti rem quamdam, citra ipsius consensum, absque imploratione magistratus, vi propria auferens, delictum comittat. Cum autem malitia delinquentis poena et aliis malis confecta-

riis

#### 40 DE IMPVTATIONE CVLPÆ CIRCA CONTR.

riis prosequenda. Inde ad intelligendum datur, cur recte Romani determinauerint, quod ipse creditor periculum postea rei ferre debeat: L. 30. ff. de pign. act. Verum huius periculi praestatio non ex contractu pignoratitio, qui inter eum et debitorem non intercessit, determinata est: Attamen, si cum consensu debitoris abstulit, tum demum oritur contractus pignoratitius, et inde Lex citata decisionem (§. 98.) datam secuta. Cuius legis explicationem ideo addere volui, cum et B. THOMASIVS in citata Dissert. §. 23. istam legem obiciat ad difficililandas decisiones Romanas culparum circa contractus.

### COMPLEMENTA MISCELLA.

- I. *Delicta priuata vera, sunt delicta, quibus co-ciuues subiecti sese inuicem citra pacta laedunt.*
- II. *Quasi delicta priuata sunt delicta, quibus co-ciuues subiecti sese circa pacta laedunt, quae laesiones tamen non tam iure civili pactitio priuato immediate vindicari possunt.*
- III. *Iniuria est factum dolosum, quo alterius quantum morale simplex violatur.*
- IV. *Interdicta possessoria constituunt actum, quo ius naturale contra eum, qui nos in usu iuris realis turbauit, coram Iudice persequimur.*
- V. *Aequitas est exceptio a iure stricto per officium humanitatis insigne alteri exhibendum determinata.*

BS ) o ( SS

